



Ehecucion di maneho pa traspaso di permiso den transporte publico

Cada traspaso di un permiso den famia, tin como consecuencia cu un otro ciudadano wardando pa yega na remarke pa un permiso, mester warda mas largo. Minister di Transporte, Ursell Arends, den cuadro di transparencia pa titularnan di permiso y pueblo en general, a laga sa cu evaluacion di peticionnan pa traspaso di permiso lo inclui puntonan di interes general, en particular oportunidad igual pa ciudadanonan yega na remarke pa un permiso den transporte publico. Pa un periodo di transicion, y te ora cambionan legislativo cu eventualmente un otro areglo di transicion wordo formalisa, Minister di Transporte ta propone lo siguiente.

1. Hulpchauffeur pa duracion di validez di permiso

Ta sosode cu taxista y chauffeur di autobus no a regla seguro (levens- en ongevalverzekering), no a spaar of cera un areglo pa un pensioen, y no por depende riba famia of sosten social pa (suficiente) ayudo financiero. Artículo 11, prome y di dos inciso, di e Landsverordening personenvervoer, ta ofrece opcionnan cu por yuda den casonan asina. Ora pa motibo di salud un taxista/autobuschauffeur no por eherce e trabou, articulo 11 por wordo aplica pa un duracion largo, es decir pa e duracion di e permiso, den beneficio di taxista/autobuschauffeur y/of e famia. A base di e permiso e taxista/autobuschauffeur y famia lo wordo sosteni pa un hulpchauffeur cu lo percursa pa provee den e necesidadnan financiero di e taxista/autobuschauffeur y famia.

2. Comision independiente

Den caso cu e permiso lo caduca mientras cu e taxista/autobuschauffeur ta considera un traspaso pa un miembro di famia/hogar *necesario* pa provee den e necesidadnan financiero di e famia, un comision independiente lo evalua si e titular ta wordo afecta irasonablemente (onredelijk) si no aproba e peticion pa traspaso. E comision independiente ta entrega e resultado di su evaluacion na e Minister di Transporte y e peticionarionan. A base di e resultado di e evaluacion independiente, y tur otro rekisito, un decision lo wordo tuma. Conforme ley, un permiso por wordo mara na condicionnan adicional. E comision lo consisti di tres persona cualifica pa haci e evaluacion, selecta a base di profielschets (expertisio legal y financiero).

3. Transparencia

Lo evalua cuanto informacion anonimisa tocante cada peticion di traspaso por publica online, teniendo na cuenta e privacidad di e peticionarionan. Tambe lo publica un lista di secuencia di peticionarionan pa taxivergunning pa cada peticionario (anonimisa cu volgnummer). E peticionario lo tin acceso na su volgnummer, y pueblo en general por wak e secuencia y controla con e lista ta wordo aplica. Cu esaki lo percursa pa mas confianza den e sistema y proceso di otorgamento di permiso, y haci cla cu permisionan no ta wordo otorga pa motibonan di patronahe politico.

4. Promove areglo financiero responsabel

Pa profesionnan independiente manera taxista y chauffeur di autobus, ta importante pa e taxista/chauffeur di autobus cera areglo di seguro (levens- en ongevallenverzekering), areglo di spaar/pensioen, y cumpli cu debenan fiscal, pa na un forma responsabel sigura su entrada. Ora no regla esaki, e taxista/chauffeur di autobus tin menos gasto riba termino corto y ta keda cu mas placa, pero tin consecucionan negativo den situacionnan imprevisto y riba termino largo. Un otro punto di atencion ta pa cumpli cu registracion na Camara di Comercio.

Minister di Transporte lo sigui dialoga cu titularnan di permiso riba e topiconan aki, y lo evalua pa stimula cumplimiento por medio di condicionnan mara na permiso. Minister di Transporte tambe lo yuda y facilita e titularnan di permiso te unda ta posibel, pa yega na areglo financiero responsabel.

Minister di Transporte ta reafirma su compromiso pa garantisa oportunidad igual den transporte publico. E maneho tambe lo dedica atencion na empodera e posicion di hulpchauffeurs. Ora trece cambio den un sistema tradicional cu no a percursa pa oportunidad igual, e transicion por trece cun'e cu privilegionan pa un grupo ta wordo afecta pa sirbi interes general. Cu e puntonan di transicion, Minister di Transporte ta percursa pa titularnan di permiso no wordo afecta na un forma irasonabel.

16 augustus 2024